



Republika e Kosovës – Republika Kosova
Paneli Zgjedhor për Ankesa dhe Parashtrësia
Izborni Panel za Žalbe i Predstavke

Anr. 1119/2021

Paneli Zgjedhor për Ankesa dhe Parashtrësia (PZAP), në panelin e përbërë nga gjyqtarët: Milena Đerić kryesuese, Ferki Xhaferi dhe Adnan Konushevc, duke vendosur përkitazi me ankesat e subjektit politik Lidhja Demokratike e Kosovës (LDK), me seli në Prishtinë, si dhe organizatës BIRN e Internews Kosova, me seli në Prishtinë, paraqitur kundër subjektit politik Lëvizja Vetëvendosje (LVV), me seli në Prishtinë, për shkak të thyerjes së heshtjes zgjedhore përmes rrjetit social Facebook, për Raundin e Dytë të Zgjedhjeve Lokale, të datës 14.11.2021, në seancën e panelit të mbajtur me datë 15.11.2021, mori këtë:

V E N D I M

Refuzohen të pabazuara ankesat Anr. 1119/2021 dhe Anr. 1140/2021, e datës 14.11.2021, të parashtruara nga subjekti politik Lidhja Demokratike e Kosovës (LDK), me seli në Prishtinë, organizata BIRN e Internews Kosova, me seli në Prishtinë, me të cilat kanë kërkuar që subjekti politik Lëvizja Vetëvendosje (LVV), me seli në Prishtinë, të sanksionohet, për Raundin e Dytë të Zgjedhjeve Lokale, të datës 14.11.2021.

A r s y e t i m

PZAP-i, ka pranuar më datë 13.11.2021 ankesën Anr.1119/2021 të subjekti politik LDK, ndërsa më datë 14.11.2021, nga organizata BIRN e Internews Kosova është pranuar ankesa Anr.1140/2021, që të dy ankesat e lartcekura të parashtruara kundër subjektit politik Lëvizja Vetëvendosje (LVV), në të cilat pretendohet se më datë 13.11.2021, në ditën e heshtjes zgjedhore kanë vërejtur se Kryeministri i Republikës së Kosovës Albin Kurti, njëkohësisht edhe kryetar i subjektit politik LVV, me vetëdije të plotë dhe qëllimshëm ka thyer heshtjen zgjedhore në rrjetin e tij social Facebook duke postuar numrin e subjektit politik LVV 144 dhe moton bashkë qeverisim duke bërë thirrje për votim gjithandej Kosovës në komunat ku i njëjti është në balotazhë. Ky postim sipas parashtruesve të ankesave është shpërndarë 379 herë dhe që nënkupton se ndikimi i tij tek qytetarët ka qenë jashtëzakonisht i madh, veprime të cilat janë në kundërshtim me nenin 3 e LZP-së si dhe me Planin Operacional për Organizimin e Zgjedhjeve Lokale të KQZ-së.

Parashtruesit e ankesave Anr.1119/2021 dhe Anr.1140, kanë bashkangjitur kopje të postimeve në rrjetin social facebook si dëshmi.

Në përgjigjet në ankesë të Subjektit Politik LVV, theksohet se kjo ankesë është e pabazuar për faktin se koha e publikimit të postimit për të cilin është paraqitur ankesa është publikuar më datën 13.11.2021 në ora 06:35 të mëngjesit, dhe se i njëjti nuk mund të konsiderohet aktiv apo i sponsorizuar sikurse edhe kopertina e tij në faqen e facebook-ut.

PZAP-i, pas shqyrtimit të shkresave të lëndës, vlerësimit të pretendimeve ankimore, provave materiale dhe fotografive të bashkangjitura, që gjenden në shkresat e lëndës, në kuptim të nenit 117 paragrafi 2 dhe 3 të LZP-së, gjeti se:

Ankesat janë të pabazuara

Paneli, pasi që vlerësoi pretendimet ankimore, gjeti se ankesat: Anr. 1119/2020 dhe Anr. 1140/21 të datës 13 dhe 14.11.2021, janë për nga përmbajtja të njëjta, dhe janë paraqitur kundër subjektit të njëjtë politik, prandaj Paneli bazuar në nenin 8 paragrafi 3 të Rregullave dhe Procedurave Nr.02/2015, të PZAP-it, në të cilën përcaktohet se: *“Me qëllim të lehtësimit të shqyrtimit të ankesave kryesuesi i panelit vendimmarrës mund të vendos ta bëjë bashkimin e ankesave që përmbajnë në vete çështje të ngjashme dhe se ato ankesa të trajtohen me një vendim”*, andaj Paneli bëri bashkimin e ankesave dhe për të njëjtat vendosi me një vendim, si në dispozitiv të këtij vendimi.

Paneli, vlerëson se parashtruesit e ankesave në mbështetje të pretendimeve të tyre, nuk kanë ofruar dëshmi të qarta dhe bindëse edhe pse barra e të provuarit bie mbi ankuesin, në kuptim të nenit 117 paragrafi 3 të LZP-së, për të provuar se shkelësi i supozuar ka thyer heshtjen zgjedhore dhe ka vazhduar sponsorimin e fushatës zgjedhore gjatë heshtjes zgjedhore më data 13.11.2021.

Paneli vlerëson se nuk qëndrojnë pretendimet e parashtruesve të ankesave se kemi të bëjmë në këtë rast me thyerjen e heshtjes zgjedhore, sepse heshtja zgjedhore për Raundin e Dytë të Zgjedhjeve Lokale të datës 14.11.2021, ka filluar më datë 13.11.2021, në ora 07:00, ndërsa sipas dispozitës ligjore të nenit 36 paragrafi 1 i LZP-se pika b): *“Njëzet e katër (24) orë para hapjes së Qendrave të Votimit për hedhjen e votës e deri në mbylljen e tyre, subjekteve politike, mbështetësve ose kandidatëve të tyre u ndalohet bërja e fushatës në çfarëdo mënyre”*, e për rastin konkret postimi lëndor në rrjetin social facebook është bërë më datë

13.11.2021, në ora 06:35 në mëngjes, që rezulton të jetë se postimi është bërë 25 minuta para se të fillon heshtja zgjedhore. Për ti vlerësuar edhe më tej pretendimet ankimore, Paneli e ka verifikuar postimin lëndor dhe ka konstatuar se postimi, përveç që është publikuar para se të fillon heshtja zgjedhore siç është konstatuar më lart, ky postim nuk është i sponsorizuar si reklamë që të shfaqet në vazhdimësi-automatikisht edhe gjatë heshtjes zgjedhore e po ashtu i njëjti postim nuk ka prova në shkresat e lëndës që është ripërtërirë edhe gjatë heshtjes zgjedhore nga postuesi i njëjtë.

Andaj, nisur nga arsyet e cekura më lartë, PZAP-i ka gjetur se nuk ka pasur thyerje të heshtjes zgjedhore pasi qendrat e votimit janë hapur më datën 14.11.2021 në ora 07:00 të mëngjesit, ndërsa postimi në fjalë është bërë më datën 13.11.2021, në ora 06:35 të mëngjesit, pra 24 orë para hapjes së qendrave të votimit.

Andaj, nisur nga arsyet e theksuara më lartë e në kuptim të neneve 115 paragrafi 1, 117 dhe 118 paragrafi 1 të LZP-së, paneli, vendosi si në dispozitiv të këtij vendimi.

Paneli Zgjedhor për Ankesa dhe Parashtresa
Anr.1119/2021 më datë 15.11.2021



Këshillë Juridike: Kundër këtij vendimi është e lejuar ankesa sipas nenit 118 par. 4 të LZP-së, në Gjykatën Supreme të Kosovës, brenda njëzetekatër (24) orëve nga momenti i marrjes-pranimit të këtij vendimi.